

Monday, September 14, 2026

Time - 2:30pm - 2:35 pm

AKASHVANI AIZAWL
REGIONAL NEWS UNIT

REGIONAL NEWS BULLETIN
(MIDDAY)



CM

Chief Minister Pu Lalduhoma'n Kaladan Multi-Modal Transit Transport Project (KMTTP) chu nakumah an peih anih tawh dawn avangin Mizo thalaite tan tawng hrang hrang- Hindi, Kawl tawng, Japanese, leh Chinese tawng Mandarin thiam a pawimawh dawn a ti.

Vawiina Mizoram Hindi Prachar Sabha buatsaih Hindi Day lawmna a hmanpuinaah he thu hi sawiin, Chief Minister Pu Lalduhoma Hindi tawng chu tute tan pawh a pawimawh hle a ti a. Sumdawnna ah pawh tawng ber an thiam loh chuan a harsat thin avangin Hindi chu a pawimawh tual tual dawn a, khawvel chu lo her danglamin, Mizoram chu ram hrang pawh lo ni se, India chu ram thenawm a nih reng dawn avangin insumdawngtawn reng tur an ni a chuvangin Mizote tan Hindi thiam chu a pawimawh hle a ni a ti. Hetihruah hian Chief Minister chuan Hindi-a tawng leh Hindi hla sak avanga an hnam inchei anga inchei chu hnam tihboralna a ni tih sawiin, Mizo culture vawng nung chungah Hindi-a tawng thiam chu a tawh tih a sawi a ni.

Hei bakah hian Chief Minister chuan Kaladan Multi-Modal Transit Transport Project (KMTTP) chu nakumah an peih tawh dawn avangin Mizo thalaite tan tawng hrang hrang thiam a pawimawh hle dawn a ti a. Tunah pawh mimala sumdawnna a lian em em tawh a, kawl tawng thiam lo tan a sumdawn theih tawh loh niin a sawi bawh a ni.



HINDI DAY

Education Minister Dr. Vanlalhlana'n mi tam zawkin Hindi a tawng an thiam theih nan Mizoram school ah te Hindi Speaking day an siam a, Hindi zirtirtute pawh an ennawn tha leh dawn a ti.

Vawiina Mizoram Hindi Prachar Sabha buatsaih Hindi Day lawmnaah Dr. Vanlalhlana chuan he thu hi sawiin, Hindi chu hnamdang te nena min thlunzawmtu, eizawna kawng hawngtu pawimawh tak a nih bakah India rama cheng nih bawk avangin Mizo hnamzia tibuai lovin Hindi tawng a thiam theih tih hriat a ngai a ti. School Education department hnuaia education reform committee chuan inbiakpawhna lamah tan lak a ngai nia an hriat avangin, Mizoram school ah te thla khatah ni 1 Hindi Speaking day an siam a, hemi atana Guidebook an siam chu school hrang hrangah an sem tawh tih sawiin, Hindi Speaking day hmanni pawh an ti zing chho zel dawn tih a sawi a ni.

Dr. Vanlalhlana chuan school thenkhatah Hindi zirtirtu Hindi tawng a tawng thei mang lo an awm tih sawiin, Hindi hawrawp chhiar thiam ringawt lova, tawngchhuah an thiam theih nan Hindi zirtirtute pawh an ennawn tha leh dawn tih a sawi a ni.

Byte: Dr. Vanlalhlana

Dr. Vanlalhlana chuan vawiin Hindi Day lawmna a Hindi subject-a Phd degree nei thar te leh Traffic Police Hindi Spoken zirchhuak chawimawina dawngtute chu chhuanawm a tih thu sawiin, Sairang a taxi driver te pawh khualzin phurtu an nih angin, Hindu spoken zirtir tha a tih thu a sawi bawk a ni.



MNF

MNF Party chuan an party working president ah Sr Vice President Pu Tawnluia an dah a,

Hemi chungchang hi vawiin khan thuchhuah siamin, an party chu tuang leh chak zawka a kal zel theih nan an hruaitute te inruat belh an ni tih an sawi a, President Pu Zoramthanga bakah Working President hi dah tharin, Vice President thar pahnih Pu Lalchamliana leh Pu D. Thangliana te ruat an ni bawka ni.

Tihian MNF Party Vice President ni mek, Pu Lalchhandama Ralte leh Pu Vanlalzawma te bakah midang 2 ruat belhin Vice President 4 an nei dawn ta a ni.



EX GRATIA

Kar kalta Zirtawpni tlai a Tuihawk in a lak vanga thi, Lawngtlai College Venga, Pu B.Lalbawiliana Fanu, Ruby Lalrinsiami Kum 6 mi chu vawiin khan Lawngtlai Bawrhsap Pu Donny Lalruatsanga'n Sorkarin a ralna cheng Nuai 4, Ruby Lalrinsiamama Nu leh Pa hnenah a hlan.

Pu Donny Lalruatsanga chuan vanduinah a thlen velah District Disaster Management Authority chuan a tihtheih ang ang a bawhzui nghal tih sawiin, Ralna sum hlan a ni ta a ni, a ti.

Ruby Lalrinsiami ralna hun hi MJA Lawngtlai District President Pu Elvis Lalthangzuala'n kaihrui a ni.

Ruby Lalrinsiami hi Zirtawpni tlailam khan ruah sur nasa tak karah Dawr a thil leitura a thiannu nen an kal chu Tuihawk luankawr ah chesual palhin metre 300 vel Tuihawk hian lenin, chhan theih a ni ta lova, a tuk Inrinni ah aruang enfiabin buaipui ngaite buaipuifel a nih hnu ah Lawngtlai College Veng thlanmual ah phum ani.

